



## MENDIZABAL MURUA familia

**U**RTSU TXIKI Urtsu-Erreka auzoan dago. Bere inguruko baso eta zelaien izenen artean dauzkagu *Etxe azpi*, *Txorondo*, *Mendigorri*, *Zehartxo*, *Goiko zelaie*, *Zelaitxo*, *Eusturea*, *Hiru erreka*.

Auzoko bidea 1937-1940 urte inguruan egin zen eta etxerainokoa ere bai.

1920an ezkondu ziren Bitoriano Mendizabal *Urt suaundikoa* eta Maria Antonia Murua *Ernaitza* baserrikoa. Eta urte horretan bertan erosi zuten Urtsu Txiki. 1957an egin zioten eranskin berria. Zazpi seme-alaba izan zituzten.

Behi, ardi eta txerriak zituzten baserrian. Lau behi, berrehun ardi eta bi letxoi eta gazta, arrautzak eta oilaskoak saltzen zituzten Ordizian. Etxean egiten zuten artoa, garia, patata eta babarruna. Aitak Fabrika Handian egiten zuen lan.

Baserriko bizimodua eta artzantza, biak eramaten zituzten, biak ziren beharrezko. Aralarren pasatzen zuten uda, apiriletik urriaren bukaera bitarte. Txabola *Elutxobarrena* parajea eta larrea *Alotzatik Arrubira* tartean zuten. Baratza ere erabiltzen zuten (aza, patata, porruak eta arto berdea egiteko). Eguerdietako otordua eltzekoa izaten zen eta afaltzeko porru patata edo barazki berdura.

Bizimodurik gogorrena ardi-mozketa egunetan izaten zen, elkarri lagunduz aritzen ziren inguruko artzainak. Eta salmenta tokia Ordizia izaten zuten, eta bi ordu eta erdiko bidea egin behar izaten zuten sei-zortzi arkume mando gainean hartuta.

Neguan, berriz, egunik gogorrenak arkumeak jaio-tzekoak izaten ziren. Negu garaia batzuetan Beizaman *Urdanpileta* baserrian egiten zuten, Azpeitian ere bai *Ordiga* baserrian, Zestoan *Akuarretxen* eta Getarin *Orrua* baserrian. Etxe haiek oso gogoko dituzte, beti oso ondo hartuak izan direlako bertan.

## Baserriaren arrastoa idatzietan

Urtsu Txiki agertzen da 1783-12-17an, Francisco Antonio de Echaveren aurrean, Enerio eta Aralarko sailen erabileraz bitartekari bati emandako botere-emaileen artean. Auzo horretakoan artean agertzen dira Urtsu-Handia, Urtsuko Errota, Urtsuegi eta Urtsu Goena ere. Bilera hartara Urtsu Txikiko bi ordezkari joan ziren, bi familia izango ziren, beharbada-eta, bertan, orduan.



## Pasadizoak

### Ardi galdua

*Behin batean 1944 inguruan, Antonio gazte zelarrik (23-24 urtekoa), ardiekin abiatu zen Zestoatik Zaldibira eta ardi bat atzean geratzen. Utzi egin behar izan zuten, eta handik egun batzuetara berriaz joan omen zen Zestoara ardi bila, hamar-hamaika orduko bidea eginez joan-etorrian.*

Informazio emaila: Exteban Mendizabal



Ezkerretik eskubira eta goitik behera:

Joxe, Exteban, Brijida, Rosario, Maria, Alejandro, Antonia (ama), Bitoriano (aita) eta Antonio.